

2

E hua i te tamaki, e whakatipua nei,
Ko te hoa kairiri kei te haohao mai.
Tenei tata tonu kei te huka² o te kaka,
Kiia ai pakura,³ e ora i te whakaware.

3

Kai kino hoki koe,⁴ e papa noa ra e, u e
He matua rawa hoki e kai te ora mai:
Mau ra e tatari ki nga po whakamatenga e, u e
O te rima, o te ono, tenei te hokai nei.

4

E kore ra e houa i te po wananga e, u e
I te pitau tutu, i te kowhai-angaora:
Taria e ahu mai ki to wai-tohunga e, u e
Ki to whakapapanga, i waiho i muri nei, e.

HE WHAKAMARAMA:

¹Matuku-tangotango.—Ki nga korero Maori o nehera, ko te tangata tenei nana i patu a Wahieroa. Na Rata i ngaki te mate o tona papa o Wahieroa.

²Huka.—He hukahuka no te kakahu, e whakairia nei hei whakaware i te pakura.

³Pakura.—He manu.

⁴Koe.—Mo te potiki a Wharerakau, mo Pekama Ngatai.

(Ko nga kupu o tenei waiata na Hone Ngatoto i tohutohu ki a Apirana Ngata.)

16.—HE WAIATA MO TE KANI-A-TAKIRAU

(Ngati-Porou).

Na Paratene Ngata i tohutohu nga kupu o tenei waiata. Kaore i te marama, na wai i tito tenei waiata, engari no te takiwa ano o Waiapu, kei reira hoki nga ingoa e whakahua-huatia ana i roto i te waiata.

1

He aha kai te rangi, ka tihorea nei, e?
He rangi haerenga ra nohou nei e Te Kani;¹
Ka iri kei runga kei te Wharau-a-Parua,² e,
Ko to tinana ra e kore nei e taea.

2

Kai parahua ai te ika ki te mounu, e:
Whai rawa atu nei, kore rawa i anga mai.
E tuia ana koe e te pua i te kahika, e,
E te ora³ iti ra, nahau e Kahutoro.